



POSICIONAMIENTO DE PURNA DEBANT D'A QÜESTIÓN LINGÜÍSTICA

Ponencia Sectorial de Purna, A Chovenalla Revolucionaria y Independentista

25 de Febrero de 2012

www.purna-aragon.org

Posicionamiento de Purna debant d'as luengas minoritarias y más que más d'as luengas minorizadas d'Aragón: l'aragonés y o catalán.

Actualment somos vivindo en un mundo que cada diya más se endreza enta la globalización, un mercau unico an que fer productos que sigan consumius por igual en totz os cabos. Ta fer posible isto ye menister pasar por encima d'as diferents culturas que bi ha en o nuestro planeta ta imponer a cultura unica, a d'o consumo. Ye platero que en un mundo globalizau no ye economicament rentable que haiga muitas culturas y luengas esferents ya que seguntes una mentalidat capitalista ye más rentable producir gran cantidad d'una mesma cosa y que ista siga consumida por todas y totz, y no pas empentar as diferents culturas y desembolicar a diversidat lingüística.

Antimás, dende fa anyos o sistema imperant nos ye encarrutando ta cambear a nuestra traza de vivir ta acomodar-nos a la cultura d'o consumo y prebando d'imponer que todas charremos una unica luenga; que gosa de estar una d'as que se charran de cutio en os estaus de gran tradición colonialista (castellano, inglés...), ya que son ixemidas por muitos puestos gracias a istos procesos de colonización feitos a lo largo d'a historia. Purna como organización chovenil d'a cucha independentista aragonesa ye de raso en contra d'a economía neoliberal y a globalización, que nos ye empentando enta ista situación de cultura unica, alavez reivindicamos a multiculturalidat y a diversidat lingüística.

Por atro costau, agora si fa u no fa, a metat d'as 6.000 luengas que se charran en o mundo se creye que desapareixeran antis de zaguers de sieglo si no se fa cosa ta remeyar-lo. Quan desapareix una luenga a humanidat no nomas cacega una gran riqueza cultural, si no tamién conoiximientos ancestrals relacionaus con as tradicions, a naturaleza y a biodiverdiversidat d'a redolada an que se charra ixa luenga. Manimenos, se puet aturar iste proceso de retacule d'as luengas empentando politicas lingüísticas ta refirmar o dreito d'os fablans ta expresarse en a suya luenga materna y empentado os esfuerzos que fan as comunidatz de fablans ta mantener u revitalizar as suyas luengas y transmitir-las a las cheneracions más chovens. Por ixo creyemos que todas y totz hemos de fer un poder ta reviscolar as luengas minoritarias, ya que fan parti d'o patrominio cultural inmaterial d'o nuestro planeta.

D'atra man, muitas de nusatras y nusatros hemos estau educaus en una cultura monolingüe, no pas como en otros puestos an que a chent charra totz os diyas en una ripa luengas esferents que dominan ta poder mantener relacions sociais, comerciales, familiars, asinas-asinas... Por ixo cal parar cuenta de que todas as personas son capatables de charrar e interactuar con a resta en más d'una luenga, lo que ye enriquecedor porque antimas d' aduyar a preservar a nuestra cultura, aprender más d'una luenga estimula a o cerebro y as funcions cognitivas, antiparti d'aprender a adaptarse a diferents sistemas de representación d'o mundo. Mesmo a Unión Europea recomienda charrar dos luengas antimás d'a luenga materna. Alavez dende Purna veyemos que ye alazetal fomentar o multilingüismo como traza de deseboquite personal e intelectual.

En Aragón se charran tres luengas actualment, aragonés, catalán y castellano encara que que oficial no bi'n ha que una, o castellano. Manimenos, a lei de luengas (Lei 10/2009 de 22 d'aviento, d'uso, protección y promoción d'as luengas propias d'Aragón) reconoix a existencia d'atras dos que son minorizadas: l'aragonés con si fa u no fa 10.000 fablans y que agora nomás ye charrau de traza materna en o norte d'o nuestro territorio, más que más en as valls d'o Pirineu. Y o catalán, con bells 29.000 fabladors ixeminaus por a franja oriental d'Aragón con muita importacia en as redoladas de "La Llitera" y "Matarranya". Actualment l'aragones ye a luenga que se troba en pior traza d'as dos, mesmo l'atlas de luengas en periglo que fa a UNESCO diz que se troba en una situación de periglo d'exintinción. Por contras o catalán como tamién se charra en muitos atos puestos difuera d'Aragón tien muitisma más vitalidat y ye calificada como una d'as luengas minoritarias más zerenyas d'Europa, con tot y con ixo siempre cal estar a la tisba ta que no retacule enta una situación pior. Por que cal parar cuenta que l'actual Lei de Luengas ye muito esbafada y no fa una fayena real de conservación ni de refirme os dreitos d'as fablans. Por ixo dende a nuestra organización creyemos que cal desembolicar politicas lingüísticas mas que más en a demba d'a educación, que dignifiquen as luengas minoritarias y que favorezcan a transmisión cheneracional d'as mesmas ta que tornen a tener mayor vitalidat en o esdevenidero.

Por tot isto Purna creye que en o cambio economico, social y politico que proposa como organización, cal esfender as luengas minoritarias que son refusadas por a tendencia mundial enta la globalización y por no estar rentables t'o sistema economico neoliberal y t'o mercau unico. Creyemos en o

dreito de todas ta expresarnos en a nuestra luenga materna y ta isto cal empetar un prochetto de revitalización y conservación d'istas chicotas luengas, por a suya valura cultural y por o suyo estreito contacto con o meyo natural d'an que se charran. Ta tot isto hemos de fer tralla a traviés d'a educación, metendo ficancia en a dignificación d'as luengas, refirmando os dreitos d'as suyas fablans y desembolicando y empentando o multilingüismo. Veyemos que nusatras como aragonesas hemos de prencipar iste treballo de consevación por as luengas minorizadas que se charran en Aragón: l'aragonés y o catalán. Porque son as que tenemos más amanadas y as que conservan as nuestras tradicions y as peculiaridatz d'o nuestro meyo natural. Alavez cal escomenciar por un cambio local empentando istas d'os luengas que si no china-chana se son perdendo, ta plegar enta un cambio global y no dixer cayer garra luenga en o xubliu.